

四庫全書

集部

欽定四庫全書

集部

文苑英華卷三百九十五
三五

詳校官庶吉士臣柳邁祖

助教臣常循覆勘

總校官進士臣朱鈞

校對官中書臣胡紹基

謄錄監生臣李維瀛

欽定四庫全書

文苑英華卷三百九十三

宋

李昉等

編

憲臺一

御史大夫

授尹思貞御史大夫制

蘇頲

開下國之副相位亞中台自非

舊唐書作匪

邦直執司天憲

銀青光祿大夫將作大匠

隋煬帝改匠為監唐初復舊天寶中再為監今尹思貞除

命在開元初英華作大匠是矣或以為監非

天水郡開國公尹思貞賢良方

正碩儒者德剛不護缺清而畏知簡言易從莊色難犯
微先王之體要敷衽必陳折佞臣之怙權拂衣而謝故
以事聞海內名動京師鷹隼是擊豺狼自遠必能條理
前弊發揮舊章宜承弄印之榮式允登車之志可御史
大夫封勲如故王者施行

授宋璟御史大夫制

黃門三台副職百寮之師紀綱是任蒞事惟能國子祭
酒上柱國廣平郡開國公東都留守宋璟含純粹之德

秉清剛之氣學研精以辨政文體要以經遠吉人之寡
敷言有訓君子之慎擇行無違正色而自具陽秋立誠
而不偕風雨必能靜專動直獻忠納規常聞沃心之任
靡憚犯顏之情使其坐以鎮俗毅一作蕤一作然當朝則不能
者退不仁者遠王臣蹇蹇懦夫有立俾先天憲式副人
瞻可御史大夫勲封如故王者施行

授李傑御史大夫制

黃門副相之重羣寮取則爰理其綱錫之以印河南府

尹上柱國武威縣開國子李傑直清浩素剛斷精密學
究文儒才優經濟物寧滯用若遇盤根人或蒙求似開
明鏡心公而惡去聲一本作正惡道正以閑邪河南擅聲天下
稱最必檢齊霜憲弘長風猷俾其立朝用爾敦俗可御
史大夫勲封如故仍驛赴京主者施行

授敬括御史大夫制

常袞

門下天子綱紀屬於風憲所以彈肅公卿課第牧守姦
詐不息法令將廢豈奉憲者道未明歟眷求忠賢舉我

事典金紫光祿大夫行同州刺史兼御史中丞充本州
團練使守捉使上柱國平陽縣開國子敬括河汾大儒
博達今古清心素行高簡自居粲然文章如振金石職
更要重處以公亮不恃祿以私身每依經以制事項以
馮翊近輔化叅京師凋殘之餘勞徠所屬自廷尉之列
分內一作外史之餘清靜而鎮流庸悉歸閭閻小康理行
第一休有聲績副茲厚一作委遇肆予命爾亞秩台司無
以時或多虞法有所貸必訪故實以澄源流直道而行

不仁者遠慎乃名位為時行之一作而可行御史大夫
時使之散官勲封如故主者施行

加劉栖楚御史大夫制

李虞仲

勅都輦之下居百郡之首尹正之重俾四方承流苟或
枹鼓不驚豪右自息所宜增秩以稱任能朝議郎守京
兆尹上柱國賜紫金魚袋劉栖楚長才挺生利用能斷
徇公忘己奉上絕私居多急病之心動者必聞之美黃
旒之姦不發赭裙之盜靡聞載勤檢馭之方頗精風化

之本繫爾才術副予簡求朕所以惜其聲獻難議遷擢
尚留劇任更俟當官就加青綬之秩重委黃圖之理宜
崇望實無替威名可以本官兼御史大夫餘如故

御史中丞

授崔沔御史中丞制

蘇頌題

勅朝請郎守尚書虞部郎中崔沔純至之心求忠出孝
精微之用博學多文故能清以激貪靜而鎮躁頃攝官
持憲履繩緒墨臨事不誣在公則聞宜正三獨之名以

光二丞之秩可守御史中丞知東都留臺司

一事

一作散官

如故

授李懷讓御史中丞制

黃門貳彼副相一其三獨不任宏才孰膺高選朝議大
夫守給事中上柱國李懷讓直方孤聳清迥特立祗服
文儒克脩典禮持疎網而不漏常嫉惡以闢邪泛虛舟
於自然不近名而過實必能克去煩苛之小節知憲章
之大體允符羣議光踐中司可守御史中丞散官勲如

故

授崔器御史中丞制

賈至

門下權判文部郎中崔器閑邪存誠公而不黨有樂枝
貞慎抱史鱗正直歷踐清列名與實偕今豺狼未寧中
外多故羣才雜用則哲惟將肅其準繩舉其憲則俾不
仁者遠邪佞以悛爾其留心宜專糾止一作可守御史
中丞餘如故

授王敬從御史中丞制

孫逖

門下肅我具察謂之秉憲貳于次相必也任賢中書舍
人上柱國王敬從雅量深遠周才博達脩德行于身謀
致文詞於國用自居近密頗歷歲時忠公盡於掌綸淑
慎形於一作闕於荆藁必能執其繩準正彼簡書宜拜三獨
之雄且膺八使之選可中散大夫御史中丞仍充京畿
採訪處置等使勲如故

授蕭諒御史中丞制

門下副相之亞朝綱允屬缺官之舉時選攸難鴻臚少

御蕭諒直道有恒澄一作公心不撓果斷之用操利器於
筆端通明之識置煩文於度外所歷清要必聞聲實將
求獨坐更佇兼才斯正色於準繩俾生風於臺閣可御
史中丞充京畿採訪處置等使

授蕭隱之御史中丞制

門下列彼三獨傲于百寮選衆為難舉能斯在中大夫
檢校太府少卿東都知糶等使護軍蕭隱之敏行深識
貞標雅器性與公清寧欺於暗室才優決斷豈遊於盤

根自任以長府委之平糴備聞堅正深叶和均將寄朝
綱允副人望宜贊貳於南憲俾肅清於東都一作路可行
御史中丞仍充東京畿採訪處置使兼充和市和糴使
散官勲如故

授張獻恭御史中丞制 常 袞

勅開府儀同三司行梁州刺史兼御史中丞山南西道
節度觀察處置度支營田等使上柱國南陽郡開國公
張獻恭正以居業直以輔仁行三復而無玷剛百汰一作

鍊而不缺階歷要重發揮刑政分總戎詰禁之柄處導
俗宣風之長講求典禮以訓三軍精辦文法以檢羣吏
瞻助孤老懷和遠夷峴南之輕裘緩帶蜀郡之得賢樂
職交脩文武儔諸古人而貞方侃然清峻自處端本靜
性一作末未嘗及私固可以準繩朝廷課第郡國入正二
丞之列俾分三獨之事可行御史中丞散官勲封如故

授盧絢裴寬御史中丞制

張九齡

勅朝議大夫中書舍人內供奉上柱國盧絢朝散大夫

檢校尚書左司郎中兼侍御史內供奉知臺事護軍裴寬等動有風規成禮樂之度行為操準是衣冠之則頃登臺閣載光天地可以軌儀三獨端肅百寮繩糾一作準所歸澄清斯在宜展舉能之効俾申執憲之誠可檢校御史中丞散官勲如故

授薛存誠御史中丞制

白居易

勅庶官之政得人則舉況中執憲準繩之司所以提振紀綱端肅內外蓋一職脩者其斯任之謂歟給事中薛

存誠選自郎署列于左曹居心靜專言皆謹正章疏駁

議多所忠益可以執憲立於朝端况副相方缺臺綱是

領糾正百官

集作司
又作度

爾得專之夫直而不絞威而不猛

不附上而

集作
以

急下不犯弱而

集作
以

違彊率是而行號

為稱職敬服斯命往其懋哉可御史中丞餘如故

授柳公綽御史中丞制

勅中憲之設糾謬懲違一引其綱百舉其職非清與直
不稱厥官諫議大夫柳公綽忠實有恒文以詞學介然

端直有古之遺風頃居臺憲累次郎位持平守正人頗
稱之擢首諫司噐望益重今副相虛集作位中司專席
惟有守者可以執憲惟無私者可以閑邪詢事審官爾
當是選光昭新命振起舊章宜一乃心以揚其職可御
史中丞散官勲如故

授韋有翼御史中丞制

杜牧

勅昔貞觀開元之為理也遠隱必見情偽必知天下如
一家兆庶如一人無他道也綱目皆振法令必行祖宗

在天方冊在地人存政舉行之非難

集作艱

故用正臣委

之邦憲朝請大夫守尚書刑部侍郎上柱國賜紫金魚

袋常有翼戴仁而行抱義以處墻仞中

集作衷

峻壇宇外

寬介特守君子之彊文學盡儒者之業周歷華貫擢為

諍臣攻子甚專言事頗切願試左輔移理陝郊馮翊之

恐失倪寬潁川之喜得黃霸壺漿迎路繼屬攀車徵為

公卿愈見風采恤刑慎罰守法當官巍然立朝為時準

直今者跡其率履委之糾繩爾其念忠文彈理之言思

立秋受

集作授

署之旨三尺律令四海紀綱所宜公共無

鄉

集作即

上意古人有言曰凡為武鼠計於用捨今之倚

任佇觀爾能唯君知臣無累所舉可御史中丞散官勲如故

授前兵部侍郎薛昭緯御史中丞制

錢 珣

物國爵之設公器也君將揭而與之者必問於朝皆曰可與則徇公况御史中丞持天下所共之法等乎庶尹

重有加焉乃詔名卿來承俊選具官薛昭緯吾閱元和
遺事嘉爾祖執憲之能軌躅可尋風聲自在美延後嗣
克奉貽謀爾又歷落開懷精明照物好讓不感寡過自
彊出典誥而理勝辭豐第甲乙而以文兼行且屬多梗
使于列藩與諸侯言繫安危事自肺腸而到社稷激意
氣而誘公忠選無虛褒一作選言有清論皆入吾耳盡
知乃心宜正衣冠立為繩準將分厥職惟聽茲言夫太
剛太柔不折則廢作之可久必在居中爾當率寮屬以

無重裝

講求振綱條而審固與其就名而生事未若審實以業
官勉思勤行無害有益可依前件

授中書舍人獨孤損御史中丞制

薛廷珪

勅漢制御史中丞入朝得與尚書令專席而坐示威重
於百辟也前代之盛風猷具存國朝用人職業尤重非
材優望峻者不中茲選丞相言爾中書舍人獨孤損儒
林挺秀卿族騰芳文擅菁英學窮壺奧演之為事業暢

之為人文立我明庭號為端士逮於寡昧歷事三朝勞
爾班行向踰二紀迴翔兩掖尹正神京直聲載揚休問
逾暢自掌我誥命垂為典謨煥一作炳然一家之書擬于
三代之際器業事望由茲而益隆蘊勵琢磨所向而可
仗朕言念理本係于臺綱詢謀股肱謂爾宜稱今以爾
為御史中丞其為我峻爾風望正言隳頽無憚觸邪勉
思舉職佇觀爾志以稱我心

授吏部侍郎徐彥若御史中丞制

李 璣

勅御史中丞以獨坐為稱豈特崇貴之而已昔韋仁約
是其官僚耳猶以鷓鴣自許不肯押公卿激揚清風振
駭良吏况長其屬者可忽慢哉兵戈以來紀綱廢壞永
惟提舉未易其人執政上言云具官徐彥若嘗司憲臺
甚著聲績而自轉遷稱速憤鬱猶多使之復為必或愈
於前日且其祖在天后朝為大理有正直詳評之聲于
公積慶因成相門而彥若克嗣其家端莊自立踐歷華

貫聲聞藹然俾持準繩無以易者是用輟天官之貳再
尊任之爾其砥礪厥心無忝所舉可依前件

文苑英華卷三百九十三

欽定四庫全書

文苑英華卷三百九十四 宋 李昉等 編

憲臺二

御史知雜

授崔寬侍御史知雜事制 常 袞

勅朝散大夫守尚書考功郎中長春宮使判官賜紫金魚袋崔寬南臺自兩丞之亞以久於其職者叅領羣務近制或選尚書郎累更執憲者稱一時多以本秩行御

史曹事以寬介直方潔秉彛守中學可辨政文皆達理
試用有績素知其才近司考課事任猶簡足以兼濟存
乎使能佇揚峻風無或廢命可兼侍御史知雜事如故

授李珣侍御史知雜事制

勅殿中侍御史內供奉李珣宗室良才士林雅望懿以
文行精於吏術近參清憲益著令名舉茲臺綱屬在公
器宜膺俊選佇揚厥職衣以朱紱光茲白簡可侍御史
知雜事仍賜緋魚袋

授高允恭兼侍御史知雜事制 元 稹

勅御史府不以一職名官蓋揔察羣司典掌眾政副其
丞者是選尤難而御史丞僧孺首以朝議郎守尚書戶
部郎中判度支案飛騎尉高允恭聞於予曰允恭始以
儒家子能文入官在監察御史時分務東臺無所顧慮
為刑部郎中守訓典復以人曹郎佐掌邦計懸石允釐
撓之集作不煩簡而無傲靜專動直志行脩明乞以臺
郎兼授憲簡雜錯之務一以咨之朕俞其言爾其自勵

集作勉

無俾僧孺昧於知人可守

一作以

本官兼侍御史知

雜事餘如故

授崔瑄職方郎中御史知雜事制

白居易

勅近歲以來副相多缺朝綱國紀咸委中憲而侍御史一人得摠臺事以左右之今御史中丞德裕以中散大夫行尚書吏部員外郎上柱國崔瑄守文無害蒞事惟精在郎署中推有才理奏補是職請觀其能因而可之

仍加寵秩操執舉錯爾無自輕可守尚書職方郎中兼侍御史知雜事餘散官勲如故

授鄭處晦職方員外郎兼侍御史知雜事制

杜牧

勅朝議郎行尚書職方員外郎上柱國賜緋魚袋鄭處晦御史中丞常有翼上言曰御史府其屬三十人例以中臺郎官一人稽叅其事以重風憲如曰處晦族清胄貴能文博學人倫義理無不講求朝廷典章飽於聞見

乞為副貳以佐紀綱以爾處晦嘗居內庭草具密命自以疾去于今惜之頗俞其言如我自得有翼為爾之知已予為有翼之德隣上下交舉豈有私愛勉脩職業所報非一可守本官兼侍御史知雜事散官勲賜如故

授兵部郎中鄭黃庭兼侍御史知雜事制

錢 珣

勅具官鄭黃庭法者治之具也以人就之則得其所理矣而執法之吏剛失入虐柔失入懦有善執者惟居其

中今御史中丞歸昌以贊貳之闕推擇斯難舉爾之書
稱善頗至亦聞爾端肅詳慎能理其身移之當官信可
陳力夫理之不勝吏實相循處剛與柔期于無失審固
在已遵行有章克念居中斯為善執可依前件

授禮部員外郎集賢院直學士賜紫金魚袋王
摛刑部郎中兼御史知雜事制

錢 珣

勅御史中丞光逢以望執憲縉紳間咸觀其初故選薦

府僚審而後定以爾學文惟博藏器則深正道甚夷有
進不競其守則峻其用必通斯可正秋曹郎率白簡史
貳綱紀之服執而整墮矣古皇之庭實生屈軼安得今
之服冕不若其古者之為草乎官有舊章爾當明舉可
依前件

授王搏兵部員外郎兼侍御史知雜事等制

李 磻

勅持紀綱以貳于中司書言動以歸于太史二者亦重

矣而躁競者徒利於轉遷器薄者止貪於清近問以職
業則杳如物外遂使南臺無典章可采東觀無注記可
求壞法曠官莫斯為甚某官王搏等並以科籍早登朝
列而憲署以搏茂族英才嘗雜事於亞相皆言其所蘊
蓄未盡施設請復兼柱下進省曹以用之丞相以柅大
臣令子曰稟訓於名父皆言其所聞見妙得規模請引
之朕前委直筆以觀之是用同獎擢無所疑焉爾其勵
乃冰霜謹乃毫簡勿循往例以正時風可依前件

侍御史

授鼎州司兵叅軍崔昇等侍御史制

李嶠

勅承議郎前行鼎州司兵叅軍崔昇等學可從政文能
按章幹局並優清勤咸著丹墀持法既佇良才白簡繩
違尤資器識宜膺石室之命俾叅鐵冠之侶可依前件

授何彥則侍御史制

李廻秀

驚臺朝議郎行佐肅政臺侍御史上柱國借緋何彥則

風標峻遠志懷毅烈學妙

一作涉

羣言行歸直道營屯河

右克膽軍儲校律湟中載清夷落歲寒彌勵終始不渝
宜承懋賞之恩允穆增榮之典可朝散大夫左肅政臺
侍御史勲如故

授慕容珣侍御史制

蘇頌題

門下朝議郎行密州司馬員外置同正員慕容珣志竭
忠讜才克學行方書之亂門傳御史直繩必踐廷奏姦
人凜然生風不避當道醜正非罪遺賢久一作攸歎長鯨

已戮擊隼方秋宜貴寵章復膺清憲可朝散一作大夫
行御史臺侍御史主者施行

投褚璆侍御史制

勅通直郎監察御史裏行駉騎尉褚璆清識雅致適文
瞻學養能見其盤錯臨事杜於脂韋比驚輕輶且持嚴
簡逢二庭之寇無乏於餽軍徵萬里之兵有聞於赴敵
念勞斯屬懋賞攸憑增速御史之端式寵侍臣之列可
侍御史勲如故

授張遊侍御史制

勅朝議郎行司農寺丞張遊清方自居專直不撓秋風
始擊每勵鷹鷂歲寒後凋斯見松柏國儲在於紅粟王
憲持於白簡式寄人天之重更聞臺閣之遷可行侍御
史散官如故

授游子騫等侍御史制

勅營田使游子騫等砥操礪行慎言檢迹清公乃持法
之端詞學皆養能之要臨事必果已畏神羊執心不回

先聞擊隼宜在鷲階之列用成烏府之遷可依前件主
者施行

授楊瑒侍御史制

勅朝議郎行殿中侍御史楊瑒風度凝整器懷沉密清
心所以激貪明識由其應務頃司王憲深練朝經體文
質以會理適柔剛以為用必能履繩作則執簡弘宜夙
從臺閣之遷更寵軒墀之列可行侍御史散官如故

授呂周侍御史等制

孫逖

勅行殿中侍御史呂周等體資一作含忠厚器韞通明能
兼飾吏之文更有過人之實並膺明選克振朝綱宜展
才於草議俾遷榮於執法可依前件

授元巽侍御史制

常衮

勅朝議郎侍御史內供奉元巽踐行直方秉心純密懿文
經務持法奉公積勞既深令聞斯洽宜從職員之正式
光風憲之選可侍御史散官如故

授蔣將明侍御史制

金史卷一百九十四
勅宣議郎殿中侍御史供奉東都留臺蔣將明祗服文
儒精詳禮體持素範以行已秉清心而在公執法不違
峻風自遠俾遷柱史分領臺綱可守侍御史東都留臺
散官如故

授崔益侍御史制

勅通議大夫侍御史內供奉前諸道營田使判官靈昌
郡開國公崔益積德垂裕清才致遠久佐稷農之重仍
參邦憲之列事必精當勤而有成宜正臺綱以明朝獎

可侍御史散官封如故

授孫會侍御史制

勅朝散大夫侍御史內供奉充福建節度判官知上都
留後賜緋魚袋孫會聞義執禮直以方外守信敦睦斷
無他腸紹儒門之學行工詩人之比興服我清憲介于
戎車休有令名動皆成務允是公選正其命秩可行侍
御史散官賜如故

授杜暹等侍御史制

韓休

勅朝議郎行殿中侍御史杜暹禮樂之器直方劭節通
直郎殿中侍御史內供奉馮宗文儒之業堅正在心咸
以清公副茲望實風霜既肅臺閣推美持我邦憲載穆
時談俾遷周史之能更奉楚冠之任並可侍御史

授裴注等侍御史制

元稹

勅水部員外郎

五字集作諸道鹽鐵轉運東都留後兼侍御史

裴注等法者古

今所以

集無以字

公共也一日去之則百職盡墜是以秦漢

以降御史府莫不用剛果勁正之士以維持紀綱季代

氏集作而還埋輪破柱之徒絕不復出朕甚闕焉去歲以

來俾

北集作

命御史丞為宰相蓋欲慰薦人之不敢為也

爾等或以吏最或以學聞當僧孺慎簡之初遇朝廷渴
用之日又安可迴惑顧慮於豪黠而姑以捐讓步趨之
際為塞職乎可依前件

授李蔚侍御史盧潘殿中侍御史等制

杜牧

勅將仕郎殿中侍御史李蔚劔南西川節度判官朝議

郎檢校尚書禮部員外郎檢校御史上柱國賜緋魚袋
盧潘等夫法不立而化行惡不去而善進雖使堯舜在
上未之有也故御史之舉職者前代有理輪都亭之奏
國朝亦有戴豸正殿之劾若非端勁知名之士不在斯
選蔚以文行進用已著勞効潘以儒雅流聞今膺拔擢
有司列狀詞旨頗公使吾綱目盡張隄防不壞不在法
吏其在他乎朕闢祗宮之門開天下之口企以待理無
有厚薄爾等吐茹侮畏之道能不愧於詩人斯塞職矣

可不勉之蔚可守侍御史散官如故潘可行殿中侍御史散官勲賜如故

授溫璋侍御史制

崔 嘏

勅大理丞溫璋朝廷用人不獨取名聲暢茂曹唱羣和而命之至於御史府尤藉才能以責官業前時陰率衆吏構成姦謀焚我帑聚其主事以火事上聞付于理寺而璋於羣疑之中獨出明見比令左驗事則果然此真憲府之任也俾戴豸冠仍加朱紱勉思奉職無忝我用

才之意可依前件

授盧就等侍御史制

勅前義武軍節度判官盧就東川節度判官爾朱杭等
侍御史居其府則掌領推按糾繩愆尤立於朝則正其
視瞻峻彼風範官號清重才資鯁直拔而用之不在階
級爾就爾杭立身有文能用嘉猷參予將席憲丞上請
咸曰得人嗚呼神羊在庭屈軼在砌觸邪指佞二物可
師無為畜縮以孤我誠臣之舉可依前件

授崔義進侍御史趙光裔鄭祁殿中丞李皎監

察等制

薛廷珪

勅崔義進等吾近以風憲之任委諸名卿中外肅然佇
其振舉果於掄選能掇菁英且言澄澹秉藝進退由禮
句義進之脩整也無怠句墻岸山立句時情藹然句先
裔之峭直也不黨句英華發外句清勁積中句祁之蘊
蓄也無多謝於前脩句聞善若驚句覆篲不止句皎之
砥礪也頗自彊於遠槩皆克荷先訓來為聞人俾之整

肅周行懲艾風殺

一作殺皆可疑

觸邪指佞庶有可觀爾當其

才朕俞其請各揚厥職懋對天休可依前件

文苑英華卷三百九十四

欽定四庫全書

文苑英華卷三百九十五 宋 李昉等 編

憲臺三

殿中侍御史

授鄭溥殿中侍御史等制 蘇頲

勅奉議郎行監察御史鄭溥等志蘊公忠才兼學行守
文法以明練循憲章以清直神羊共觸常聞避馬之雄
夕鳥明飛疑作夕鳥明飛俾叶遷鶯之舉可依前件

授敬昭道殿中侍御史等制

賈

至

總目作蘇頌

勅朝議郎行監察御史敬昭道等見素為質懷清守道

學以潤身文能比事自乘驄曉謁繁一作繫隼秋飛或出

稟王綸或入持天憲傳一作銜使者之命往則有功按罪

人之賊居而不撓因其績用採以聲華宜叶歲遷允符

時議可依前件

授第五琦殿中侍御史等制

門下監察御史第五琦南海長史楚璆等吏才貞固公

心諒直可以佐軍師歷試艱難必聞其政南越留務西
憲準繩是擇髦傑用康厥任俾膺寵命欽乃攸司第五
琦可殿中侍御史楚璆可守南海長史兼衛尉少卿餘
如故

授高岑殿中侍御史制

勅京兆府長史高岑脩詞立誠好古博雅策名早從於
吏道當劇亟聞其政聳人而多艱脫豺狼之肆虐士也
有節逃戎寇之逆命貞心峻操無忝前脩宜超柱史之

列用

開一作激

忠臣之志岑可行殿中侍御史

授盧虛舟殿中侍御史等制

勅大理司直盧虛舟閑邪存誠遜世頗養持操有清廉之譽在公推幹蠱之才大理評事權臯臨難思義守死善道見危必履其臣節在困能變於人謀憲簡繩違紀綱斯屬宜擇髦士俾肅周行虛舟可殿中侍御史臯可監察御史

授董晉殿中侍御史制

勅汾州司馬董晉恪慎勵精詳於吏事飲冰將命克有成績準繩之地舉直任能俾彰善於使車宜即真於憲簡可殿中侍御史

授李常殿中侍御史制

常 衮

勅朝散大夫行河南府陸渾縣令李常等堅白持操通明劾官彰吏跡於神州著公方於近縣秉憲之職惟方是與俾諧僉議用肅具寮可依前件

授蓋又元殿中侍御史制

勅監察御史蓋又元直清勵行弘濟知名擢在憲司綽
然有裕董其軍賦成績可嘉宜增執簡之威仍佐登壇
之律可殿中侍御史

授王延休殿中侍御史制

勅朝議郎行監察御史東都留臺王延休雅有文行精
於吏術自膺察視克舉風憲績勞當選一作獎善惟先

一作俾新執法之寵式先彞序之進可行殿中侍御史

依前東都留臺散官如故

授王翼殿中侍御史等制 徐安貞

勅朝議一作請郎行監察御史王翼五從弟朝請郎行監察御史級等咸以貞固爰司察視驟聞舉直亦既懲姦歲月增深昇遷有序並可殿中侍御史

授崔楚臣兼殿中侍御史制 白居易

勅成德軍節度押衙銀青光祿大夫檢校太子賓客兼監察御史崔楚臣材膺爪士職在牙旗每祇命以奉辭必竭誠而得禮既加詳敏亦念恭勤式示寵名宜遷憲

秩可殿中侍御史餘如故

授裴廙殿中侍御史制

勅具官裴廙貞觀初張行成為殿中侍御史糾劾巡察

明集作時以為能朕思弘貞觀之風故選御史府官亦先

其精敏剛正者以爾廙動循道理語必信直勵其志節
有類行成因授殿官無忝吾舉可殿中侍御史

授李種常溥裴達殿中侍御史等制

崔 嘏

勅左拾遺李種等御史府有三院凡所選用其器得以
專達必取其剛廉勁健才行兼至者則可奏而授之今
種朴重有文直而不訐司我諫納弘益仍多以溥泊達
咸用詞學器識累參賓畫研朱益丹瑩玉無玷皆可以
脩明憲職振凜一作起霜標屈軼有靈獬豸不懼惟此二
物爾其師之可依前件

授鄭韜殿中侍御史制

勅監察御史鄭韜御史府三院轉遷雖曰彛制至於用

舍進退亦繫於一時之事迹以韜立志甚賢居官稱職
霜簡在手風標竦身其長史言請用遷陟班我殿內升
為近臣屈軼神羊無怠前志可依前件

授蔡京趙滂等御史等制

勅監察御史蔡京中武軍節度副使趙滂桂管副使鄭
魯洎陳許觀察判官薛蒙等朝廷之選御史雖委其長
吏得以專舉然亦詳求物議然後取舍無私憲丞上言
滂與魯洎蒙皆業於儒術傳以吏道其剛明勁果可委

以繫斷其溫敏莊肅可資其檢繩而皆久滯藩方未昇
朝序吾且循其聲跡頗契符言是用擢自賓筵置於憲
席而京再覆大獄吏不敢欺滿歲當遷吾何所恡京可
殿中滂可殿中魯洎蒙並可監察

授牛希逸殿中侍御史李珽監察御史制

薛廷珪

勅具官牛希逸等我以憲章法理之任付于歸昌俾嗣
復家聲振舉職業逖聽風采佇整頽隳今以爾希逸珽

逸等列狀來上且言文行脩飾操履端潔可使簪白筆

之士畏爾如堯羊舛之明庭聳我昌運樂聞爾志允叶
人情即俞所陳式旌懋選噫澄清之始糾正為先爾宜
輔助歸昌提振綱紀無或碌碌以謝前脩則驗爾脩飾
端潔之道矣而闕疑是人名隱鱗戢翼負志求伸既得其時
佇觀所尚而今而後可不勉之可依前件

監察御史

授馮嘉賓左臺監察御史制 李 塢

勅通直郎行瀛州河間縣丞馮嘉賓砥礪名節恭勤職
務幹能兼備清直有聞黃綬隨班未展才用繡衣蒞事
方觀舉察可行左肅政臺監察御史散官如故

授鄭繇監察御史制 蘇 頌

勅通直郎行右拾遺鄭繇心堅而靜體密而和文章揆
發學思該敏諫臣謹議久列瑤墀御史直繩宜遷石室
可行左御史臺監察御史散官如故

授蔣冽等監察御史制

孫 逖

勅朝議

一作通直

郎行大理評事蔣冽等脩身有裕從事惟

明標麗則於文場効公清於吏道方期遠致必藉兼才
宜膺刈楚之求俾叶持繩之寄可依前件

授姚闓監察御史等制

勅朝議郎前行同州司法參軍闓內道採訪度支使上
輕車都尉蕭縣開國男姚闓等砥名勵節博藝多能或
嘗佐台臣以清關輔或頃諧宮職見美朝端度才而昇

舉善以勸俾同官於察視宜並拜於丞郎可依前件

授邢巨監察御史制

勅前守監察御史邢巨器能通敏詞藻清新久著令名
兼稱利用終喪有禮既及於一有外字除執憲須才宜居於

舊一有府字可監察御史

授崔炎監察御史制

常袞

勅權知絳州絳縣令崔炎慎學潤身工文飭吏錯薪刈
楚竹箭有筠蒞事咸許於宓生遺風尚傳於絳老公才

可擢朝聽用章宜甄避蝗之美式踐栖鳥之列可監察御史

授源咸悌監察御史制

勅陝西運使判官朝議郎試秘書省秘書郎攝監察御史賜緋魚袋源咸悌爰資素行早履清途假其執簡之名佐彼汎舟之役且聞集事亦既書勞滿歲即真俾光使局可行監察御史餘如故

授梁褒監察御史制

勅朝議郎試大理司直兼監察御史知河東節度上都
留後梁褒業繼儒門才優吏術潔已以進貞心不渝職
佐上軍榮參清憲在公益慎於事尤精宜分察視之員
更勵風霜之操可行監察御史散官如故

授楊護監察御史制

勅守左拾遺楊護服于古訓文以彰之靜專向方恒久
其道近參侍從之列不忘忠謹之言俾執清憲佇揚厥
職可守監察御史

授皇甫翼等監察御史制

韓休

勅朝議郎行河南縣尉皇甫翼朝議郎行長安縣尉韋
紹朝議郎行醴泉縣尉張季瑀等備聞清操雅有深識
進乃安卑退非求譽察其才行副是名實任之舉直可
以觸邪並可監察御史

授鄭虛心監察御史制

勅左拾遺內供奉鄭虛心茂其德業蘊是辯詞識通於
政理行著於公直清可勵物正以繩違褐衣名見既司

諫省之職繡服承榮俾奉憲闡之任可監察御史

授陳山慶監察御史制

王敬從

總目作敬滋

勅宣議

一作德

郎行大理評事攝監察御史河西節度採

訪處置使判官陳山慶植性方雅從事公勤評刑有欽
恤之名攝職著軍州之効任惟執憲寄以佐邊此焉擇
才佇聞成績可監察御史

授李珣監察御史制

元 稹

勅前監察御史襄行李珣比制多以詳練法理者行於

御史府中

集無中字

或滿歲即真或不時署位亦試可之義

也以爾珣文學周敏操行端方執喪有聞俯以就制復爾故秩勉脩乃誠可監察御史餘如故

授張徹宋申錫等監察御史制

白居易

勅舊制副丞相缺中執憲得出入御史缺則於內外史

集作官

中考覈其實封奏其名以補之今御史中丞僧孺

奏具官張徹具官宋申錫皆方直強白可中御史章下

丞相府丞相亦曰可朕其從之並可監察御史

授庾敬休監察御史等制

勅渭南縣尉庾敬休等咸文行清茂士之秀者宜從吏
列擢在朝行各隨才用分命以職司諫執憲佇有可稱
授牛僧孺監察御史制

勅河南縣尉牛僧孺志行脩飾詞學優長頃對策于庭
其言甚直累從吏職頗為滯淹訪諸時論宜當朝選俾
升憲府以觀其才可監察御史

授蕭鄴李玄監察御史制

崔 嘏

勅御史府居朝廷之中傑出他署蓋以圭表百吏糾繩
四方故選其屬者必在堅明勁峭臨事而不撓不獨取
謹厚溫文脩整咨度而已爾等皆以詞華升于俊秀從
事賢侯之府馳聲館閣一作學館之中籌畫居多操持甚固
是宜持此霜簡峻其風標使避馬之謠不獨美於桓典
埋輪之志無所愧於張綱勉服寵榮無忘職業可依前
件



文苑英華卷三百九十五

欽定四庫全書

集部

文苑英華卷三百九十八至

詳校官庶吉士臣柳遵祖

助教臣常循履勘

總校官進士臣朱 鈞

校對官中書臣胡紹基

謄錄監生臣李維瀛

欽定四庫全書

文苑英華卷三百九十六

宋

李昉等

編

卿寺一

太常卿

授姜皎太常卿制

蘇頌

黃門命卿之貴以象冬春化人之本孰踰禮樂殿中監

上柱國楚國公姜皎貞夷

一作夷

粹溫精密純固蘊深厚

之量懷直方之道學皆為已聞義思齊忠以事君立言

成則自歷屯險爰憑翊戴鳴謙滿於視聽好讓存於始終故可銘之鼎彝光我簪紱在昔唐典惟清乃命洎于周官以和為重宜守太常卿勲封如故主者施行

授楊綰太常卿制

常 袞

門下舜以伯夷作秩宗漢以列侯掌郊廟至於圓丘大射之制禮官博士之論莫不綜詳得失而折衷焉故事職尊冠九卿之首朝議大夫守國子祭酒兼脩國史賜紫金魚袋楊綰常在於道亦周於仁文以君子之言生

知聖人之意司我載籍鴻聲不泯常典選舉後之法程
迺者崇進名儒俾其宣明師訓講求三代稽合五經濟
濟諸生誨之不倦飽於道德之富成其禮讓之風况恭
儉忠信恪一作恪守而彌固一時模表清議所高固可以處
楊震桓榮之位領曲臺太子之重勉思厥服以稱任賢
可守太常卿依舊兼脩國史散官如故主者施行

授趙宗儒太常卿制

元 稹

勅銀青光祿大夫守太子少傅兼判太常卿事趙宗儒

昔叔孫通徒以綿蕞草具之功遂獲封侯之賞况朕始

見天地初

集無初字

朝祖宗哀勵祗嚴不克是懼惟爾肇自

清廟逮予還宮贊道法儀踰於四百俛伏趨數訖無尤

違夫何叔孫用是為比顧此冲昧實賴老成不有甄升

孰明勤蓋奉常正秩左揆兼禁六樂九儀興替在此無

忘勗率以厚人倫可檢校尚書左僕射兼太常卿散官

勲封如故

授崔羣右僕射兼太常卿制 李虞仲

勅僕射貳令之職也奉常正卿之選也假中臺之極稱
冠列寺之崇秩無此兼命必資重賢前荆南節度管內
觀察處置等使銀青光祿大夫檢校吏部尚書江陵尹
御史大夫上柱國清河縣開國公食邑一千五百戶崔
羣道合時中識通政本含五行之秀氣為一代之偉人
文學致名公忠蒞職清貞不撓方廉自持曩升台階取
一作彌我憲祖實著贊時之績用存經國之規周旋累朝
揚歷大位出作垣翰入標羽儀風雨有不已之鳴雪霜

無可變之色秉是全德罔聞異詞乃者輟自夏卿授之
戎闡統荆衡之巨鎮嗣羊杜之前聲政推洽平理在徵
復禮樂之器予心所難冀流合雅之音將考依經之制
慎簡斯久僉諧乃俞俾迴軍旅之謀式暢人祇之職伯
夷官業佇乃脩明可檢校尚書右僕射兼太常卿散官
勳封如故

宗正卿

授高平郡王重規司屬卿制 李 嶠

鸞臺百工惟時必在推擇九族既睦仍資敦叙右千牛
衛大將軍上柱國高平郡王重規宗室儀表衣冠領袖
有姬旦之藝兼劉蒼之善出居連帥功名著於兩河入
奉鈞陳誠款申於八校本枝望重河海職隆宜輟掌於
魚鉞俾專司於鱗族可司屬卿勲封如故主者施行

授韋希仲宗正卿制

蘇頌

黃門中衛司階已崇於命將上卿為府尤重於睦親左
衛將軍上柱國兼通事舍人內供奉韋希仲以醞藉之

姿中折旋之禮趨事端雅吐詞雄暢束帶立朝既副聲
實彰纓在位迭居文武宜輟魚鈴之委叙于麟族之盟
可宗正卿餘如故主者施行

授褒信郡王璆宗正卿制 孫 逖

門下公族之任得才則難舉親而官選舊惟允銀青光
祿大夫殿中監上柱國褒信郡王璆雅正一作志惟恭虛

懷敏達近屬蕃翰中朝一作朝端羽儀無競維人不矜於貴

分克勤于位忠每効於公敦叙是司疇咨所屬宜居六

尚之職以副九委之勤可宗正卿

授濮陽郡王澈宗正卿制

門下宗卿設位邦族是司必擇親賢

一作賢能

以光名器金

紫光祿大夫行太僕卿員外置同正員上柱國濮陽郡
王澈清貞履道淑慎持身行無越思動不踰矩以才從
政於歷官而則深以地推恩在同姓而為近敦叙之任
疇咨所難宜受寄於本枝更遷榮於列棘可行宗正卿
官勲如故

授李曠宗正卿制

賈至

門下前弘農太守李曠體正心和操端行潔或政能茂
異所蒞必聞或忠孝兼全避權勤讓咸推公議多負卿
才官惟其人用必有適宜欽爾職以弼予教可守宗正
卿

授李琬宗正卿制

常衮

門下堯親九族禮重於敦序漢睦諸劉秩存乎宗正內
姓之選宜伊異人三從叔祖銀青光祿大夫前婺州刺

史本州團練守捉使上柱國荊國公琬才秀本枝挺此
公器忠敬達順簡廉向方飭禮樂於身文詳典刑之政
體夙所任遇久於階歷勲勞理行當亦兼書思有補察
義深肺腑固可以居宗室大臣之位叙文昭武穆之親
懷德任賢敬茲休命可宗正卿散官勲封如故主者施
行

授宗正卿嗣鄭王遜大理卿李充叻宗正卿等

制

錢 珣

勅九卿間重而顯者大宗正卿與廷尉實次奉常鳥易
官而處惟典之章具官遜等皆吾屬之楨幹也而又荷
出相戟之門遜繼分郡符必聞其政久歷庶位咸稱有
材克助承忠孝之家踐修罔墜多所該練揚于縉紳今
載葺京師敬先宗廟資乎集事速以成功而方備法官
是宜改秩往趨急務更在厲精伏念旬時獄可知也我
有具律遜其盡心可依前件

光祿卿

授房光義光祿卿制

蘇頌

門下上卿之貴爰因德選終獻之禮必由才致宣威將
軍上柱國房光義門承冑緒地聯姻戚雅容端操惟玉
有溫擇行踐言復珪無玷頃祇班序允稱望實蘭猗趨
職已一作仗於誰何栢梁賦詩俾聞於總領可太中大
夫守光祿卿勲如故主者施行

授廣武郡王承宏光祿卿制 孫逖

門下銀青光祿大夫行房州別駕員外置同正員廣武

郡王承宏地在維城慶延分土頃車周慎因從降黜捨其公犯用申猶子之恩復其舊資俾踐列卿之秩可光祿大夫光祿卿員外置同正員

授韋珙光祿卿制

門下銀青光祿大夫慶王傅員外置同正員上柱國扶陽郡開國公韋珙衣冠耆舊德行名賢吏術該通嘗聞理劇道心遠曉雅好攝生一在優閑久淹年序恬和自保志力猶強宜有命於移官俾承榮於列寺可光祿卿

員外置同正員勲封如故

授吳仲孺試光祿卿制

賈至

門下守衛尉少卿充朔方經畧副使吳仲孺心溫而直
識敏而和習韜鈴之秘旨知孫吳之大畧久副戎幕克
濟謨猷伊茂勲之可嘉俾寵光而宜及昇其階序列在
正卿可中大夫試光祿卿

授前虔王傅賜紫韋師貞光祿卿制

錢珣

勅具官韋師貞國朝考課之法有三善者升上下籍師
貞強仕之歲繼為字養糾率之官三善之名四書于籍
校諸能事不亦多乎歷年且深為吏斯得慰茲班白宜
有陟遷夫辨酒必良視牲不瘠祭祀之事繁爾所司往
為列卿勉戒郡吏可依前件

授韋韜光祿卿等制

薛廷珪

勅具官韋韜等卿守膠庠僉曰清暑序遷慎擇必惟其
人以韜儒素成家直方守道源本粹茂材術周通以績

詩禮飭躬簪裳著代心惟耿介志在功名以承休養素
典墳服膺螢雪成如麟角雅有鳳毛以承又鼎甲華宗
松筠茂行貞方從政諫讞有聞而皆久脫朝簪能安陋
巷列卿曹而象月次國學以橫經我俞丞相之求爾叶
輪棘之用敬慎爾事往臨厥官無或素飡以塞虛位可

衛尉卿

授崔惠童衛尉卿等制

孫 逖

門下尚主之恩允歸於人秀睦親之典必洽於朝榮駭

馬都尉崔惠童豆盧建等在人物士林在勲華忠一作貴

緒行能雙美才貌兼資善道自修令名無忝錫之姻好
已承築館之榮寵其章服宜列象河之位惠童可銀青
光祿大夫衛尉卿建可銀青光祿大夫太僕卿並員外
置同正員

授馬承進試衛尉卿制

賈至

勅左金吾衛大將軍馬承進能以勇幹久於戎旅勲勤
克著獎命宜加俾列九卿仍叅八命可特進試衛尉卿

授向昌鑾試衛尉卿等制

勅前太子洗馬向昌鑾三品子昌鈇等代業忠貞死於
王事能遵先志常著貞誠稽彼典謨賞延于代俾超秩
次是用旌善昌鑾可試衛尉卿昌鈇可通事舍人

授前鹽鐵淄青催勘使檢校左散騎常侍王鄩

衛尉卿制

錢 珣

勅具官王鄩等稱職之吏無所陟明則陳力者之志怠
矣爾自居官次必公為先若恥告勞但思責實頃者乘

諸軺傳使彼海濱善徵榷酤之名允集鹹鹺之利往不
廢命還可程功是用進爾於朝且升卿列宜奉警巡之
事如專行役之心克念不渝後寵當至可依前件

文苑英華卷三百九十六

欽定四庫全書

文苑英華卷三百九十七 宋 李昉等 編

卿寺二

太僕卿

授王希雋太僕卿制

蘇頲

黃門僕臣之任王命斯允在德而舉其名必彰

一作銀

青光祿大夫檢校太僕卿上柱國華容縣開國男王希雋門承舊閥器蘊通才立言可以敏事為政可以居劇

登于副尹聲滿於字人試乃列卿眷踰於數馬巾車是屬建鼓攸司爰賴服勤宜膺邦寵可太僕卿勲封如故
主者施行

授王斛斯太僕卿制

孫逖

門下安西大都護王斛斯將略稱多忠誠克著頃自

二

一作自頃膺

邊寄頗洽人心間歲以來頻有騷警能清寇虐

不頓甲兵契軍國之遠圖得攻拒之良術有勞懋賞自昔如茲宜踐列卿之位俾兼辨護之職可太僕卿員外

置同正員兼安西都護等如故

授王昱太僕卿制

門下列彼九卿正于羣僕允膺茲命必藉兼才正議大夫守太原尹北都留守使持節河東道諸軍節度營田副大使知節度事兼採訪處置使攝御史中丞上護軍賜紫金魚袋王昱韜是明斷資其理識成務有餘奉公不撓自持軍律兼委使車能啓刑書以懲貪吏到官未幾除惡已多類能則然賞善宜及俾升榮於左馭仍受

任於北京可守太僕卿兼太原尹餘如故

授李林宗太僕卿制

門下中大夫守太常少卿上柱國李林宗行能溫厚器
識該深清白奉公嘗聞吏術恭讓應物更表身謨自亞
河海亟移星歲友于之愛實掌樞衡致美之心俱懷退
讓遠嫌滋久舉滯當遷宜正位於名卿俾欽承於密命
可太僕卿散官勲如故

授竇鏐太僕卿等制

門下申以婚姻必求於才地制於祿位兼取於親賢竇
鏐等克嗣高門能修善道有溫恭之言行兼美秀之形
神勲華之緒既連於舊戚選尚之恩更諧於新禮俾升
榮秩乃錫寵章可依前件

授敬令琬太僕卿制

賈 至

勅前左金吾衛大將軍員外置同正員敬令琬陳力戎
事忠勇有謨入九軍之副獻七戰之獲嘉其誠節錄乃
茂功俾列卿士是司馬政可太僕卿員外置同正員充

朔方經畧副使

授許誠言檢校太僕卿制

勅金吾大將軍許誠言心和志堅訥言敏行被服禮義嗣主組之資策名委質誠文武之任課績斯著公勤無斁警其晝夜顧乃執金之勞象其河海寵以列棘之位可檢校太僕卿

授劉士涇太僕卿制

元 稹

勅卿寺甚重不易其人或以勲以親以報以勸又何愛

焉銀青光祿大夫前檢校大理少卿駙馬都尉劉士涇
去歲西戎跳入涇上京師戒嚴朕慨然有思廉頗李牧
之志而習事者言爾父司空之在涇也築平涼等八城
二堡塹保定平原使涇人益樹麥禾以復后稷公劉之
教十有六年犬戎不敢東顧朕聞其人思見其後果有
令子在吾懿親與之討論亦自集作奇士鋪陳將略殊
有父風訪其班資則集作且曰亞諸卿之間嘗十年矣今
乃除其憂服命以太僕宣唯報爾先臣榮吾戚里亦欲

使緣邊諸將顧其愛子為我竭誠可守太僕卿駙馬都尉散官勲如故

授鴻臚少卿賜紫賈涓太僕卿前太常丞吳方

太原少尹制

錢珣

勅具官賈涓等涓比以學文通經之勤而不得志於壯歲束帶入仕今至九卿紱冕既崇光陰云晚詔之就列以慰其心方吏術甚長免官仍久暮齒已踰於月制下僚尚歎於陸沉置之不遷君道何在往作亞尹錫之金

章亦有以嘉於老者矣可依前件

授太僕卿制

薛廷珪

勅具官某書曰昔周穆王命伯冏為太僕正曰昔在文武聰明齊聖侍御僕從罔匪正人以承弼厥辟且曰僕臣正厥后克正僕臣諛厥后自聖太僕之為官也重矣朕每讀書允擇其可矧惟前代畢用名臣數馬執綏故實具在為予禦侮作我前驅審官擇人今以命汝稽諸訓誥得不勉之可守太僕卿

大理卿

授蔡法度廷尉制

沈約

門下民命所懸繫乎三尺

尺一作一

止殺除殘

一作害

寔由乎

此是以臯陶作士五刑惟明于張蒞官世無冤獄且漢代律書出乎小杜吳雄以三世法家係為理職郭躬以律學通明仍業司士爰及晉氏此風未泯叔則元凱並各名家自茲厥後斯尚漸薄迄至于今損棄頓盡衣冠士子恥復用心州郡姦吏恣其取捨舞文弄法非止一

塗朕膺天受命為兆民主每一念此忘寢與食尚書刪
定左曹郎中蔡法度少好律書明曉法令世之所廢篤
志不怠至於章句踳滯名程乖礙莫不斟酌厥衷允得
其門方欲寄以國刑開示後學文一作才取士豈有定
方自世道澆流浮偽雲起量計多少辯校錐刀若遵往
從舊守而勿失豈所以軌儀上世垂風于後宜加褒擢
弗繫常階可守廷尉卿主者施行

授陸餘慶大理卿制

蘇頌

黃門法者天下所共廷尉天下之平選衆甄才惟明克

允宗正卿上柱國廣平郡開國公荆一作判尚書左丞陸

餘慶早回翔於近密久踐歷於中外雍容文雅自然素

微清商蕭散風華莫不瑤林瓊樹必當和而不撓貞則

有恒正罰金於後人戒刻木於前吏念茲欽恤深可哀

矜宜修白雲之典俾靜黃沙之職可大理卿勲封如故

主者施行

授李成式大理卿薛景仙少府監制

賈至

門下守廣陵長史李成式貞白儉約履歷清貫前鳳翔
太守薛景仙忠義慷慨憤激危時靖鎮藩條咸有成績
迺遷中外宜登卿士成式可試大理卿景仙可少府監

鴻臚卿

授張暉鴻臚卿制

蘇頌

黃門賓客旅庭戎夷在邸眷言任職必佇其才銀青光
祿大夫詹事兼尚書右丞上柱國鄧國公張暉雅量溫

恭志誠忠信懷直方而不蔽務寬大而不雜委之軍旅則嘗服威名并之國朝則咸宜令典非契因潛躍義焉始終可辨鴻臚之儀惣象胥之事爰加寵拜允符成獎可鴻臚卿勲封如故主者施行

授武三思鴻臚卿制

孫 逖

門下典于屬國列彼正卿班秩既崇寵光斯在金紫光祿大夫行國子監祭酒武三思延恩戚里効職公朝能勵公勤以脩名檢項在膠序頗淹星歲度材而用舉類

而遷宜增三揖之榮俾正九賓之禮可行鴻臚卿散官如故

授杜希望鴻臚卿制

門下賞以懋功官無虛授所貴天秩斯為國典朝議郎守太僕少卿員外置同正員使持節都督鄯州諸軍事兼鄯州刺史隴右節度副使仍知經畧度支營田等留後事賜紫金魚袋杜希望器能開敏才畧雄一作弘深識韜鈴之大綱知戰守之良術頃令討罪爰委行師不憚

艱危常先士卒恩威必備權變多方狂寇已清堅城又克疇庸是屬舉善攸歸俾膺超等之榮仍列上卿之位可通議大夫守鴻臚卿員外置同正員攝御史中丞餘如故

授李先進鴻臚卿制

賈至

勅左驍衛將軍李光進行已莊肅臨戎果斷有卞莊之勇懷孟明之材屢獻奇功益聞幹畧克副難兄之業能摧強寇之鋒允武允文宜加美秩

一作士

光進可鴻臚卿

同正

授蔣渙鴻臚卿制

常袞

門下古之上卿次公一等至于西漢每與列侯叅決朝
議今之秩望亦謂之崇朕方修文德以撫區外則重譯
象胥之事九儀相贊之職正用髦碩俾之典領銀青光
祿大夫檢校刑部尚書知省事上柱國汝南縣開國公
蔣渙顏子之德行張仲之孝友能積其厚以叢于身恭
儉之訓可以軌俗學通文變高視一時非得喪之可干

亦剛柔之相濟服在通列且踰二紀精於憲章舉有倫
要東雍居部近郊移風以禮除暴人安其業俾京師之
河潤守一作首經術之循吏司秋會府訓夏議刑以之弼
教能用中典時屬四夷之叙叅授大賓之任韓暨以宿
德而拜陳紀以至行而遷求舊任賢正當此選待遇諸
國宜約故事使有準以明等威也可檢校刑部尚書兼
鴻臚卿散官勲封如故主者施行

司農卿

授鄭賁司農卿制

門下國有大農實司金穀茲惟古官之重難於正卿之
拜朝散大夫試秘書監兼侍御史上柱國賜紫金魚袋
鄭賁通敏良才沉詳雅識明斷臨事貞修奉公所更秩
序必著聲績早叅幕畫在樽俎而止戈自董軍儲有京
坻之足食適時多可選衆攸歸爰籍變通主其出納務
殷任切倚辨當仁宜膺理粟之命佇繼康成之美可守
司農卿散官勲賜如故

授裴武司農卿制

元稹

物一有司字農天下之大本也故國有九列而司農氏居其

一焉前代非牟融之修理康成之儒學不在茲選今海

內無事思與公卿等樹立根柢以制四方於是集作是用外

選方伯之善於其職者入補茲任謂之恩榮前荆南節

度觀察處置等使中散大夫守江陵尹兼御史大夫上

柱國賜紫金魚袋裴武予聞其先始以孝友書於國籍

其後果集作果有丞相為唐名臣賢彥因仍代濟不絕武

亦嗣其忠孝益熾家聲鬱為元僚所至稱理嘗居內史
屢入正卿自華至荆無非劇地鍵轄豪右衣食煒燁嚴
而不殘仁而有制鎮定南服予方賴之而亟請來朝因
求內任嘉其戀我難奪乃誠假以秩宗之榮用制國衆
之重費而不屈爾其勉之可檢校禮部尚書兼司農卿
餘如故

授司農卿制

薛廷珪

勅具官某書曰昔我先公五世后稷以服虞夏夏之衰

也棄稷不務先公不窟用失其官至于武王昭前人之
光明事神保人莫不欣喜訓誥其在朕安敢失墜而叔
世偷薄乃不知稼穡之艱率以三署為華輕其東用寢
以成俗嗜鄭玄漢之名儒也韓信漢之上將也尚聞徵
拜或至就加一作家來奉疇庸得不宜畏敬受羲和之職
往修后稷之官豐阜有聞陟勸斯在可

太府卿

授豆盧欽望太府卿制

李嶠

鸞臺宗卿之任選衆尤切銀青光祿大夫檢校司禮卿
上柱國芮國公豆盧欽望體業貞簡幹能詳備歷官中
外具聞政績象河惟月太府國泉繁要所鍾委任斯在
宜加榮一作寵擢允茲公議可太府卿勳封如故王者施
行

授李從遠太府卿制

蘇頲題

門下膺河寺之秩寵選方高致泉府之殷惟才是屬銀
青光祿大夫行黃門侍郎上柱國常山縣開國男李從

遠清密任道直方為量學切山高詞場雲鬱闕里之室
動不違仁潁川之門居而會理比登要近備効忠益宜
迴夕拜式踐冬卿可守太府卿勲封如故主者施行

授呂崇賁太府卿制

常袞

門下九卿之重叅理於佐邦六府孔修頒貨於列藏歷
代右職莫非高選開府儀同三司行太子賓客上柱國
公呂崇賁忠謹良實居簡向方能用晦於精辨亦體微
於剛貞一作直峻節孤立清心確然以長才之有餘應羣

務而多適擁旄

一作旌

乘塞周歷大藩薄於戰功經以事

典用明既富之教必厚豐財之德自頃艱阻有司曠廢
府寺寂寥卿府虛設寢成其弊朕甚懼焉今再舉舊章
各歸其局出納之地眷求惟精兼領三尚之煩以榮四
至之列可行太府卿散官勲如故

授裴武太府卿制

白居易

勅聚九州之賦辨百貨之名按其度程謹其出納孰為
主者外府上卿務殷秩崇不易其選具官裴武有通敏

之識有倚辦之才以茲器用早膺任使小大之務罔不
勵精累有勤績存乎官次而受藏之府國用所資若非
使能何以集事俾升顯列仍委劇務爾宜率其官屬欽
乃職司會帑藏出入之要修權量平校之法以遵成式
無使改易謹而守之斯為稱職可

文苑英華卷三百九十七